

## Clubhausweihe Hornussergesellschaft Thörigen

Es war einmal an einem schönen Waldrand  
Wo plötzlich ein schönes Clubhaus stand

Agfange het die Gschicht vor fasch 40 Johr  
Und gäh heigs schiins ä hufe graui Hoor

Ganz so eifach isch dä Bou denn scho nid glunge  
D' Behörde hei schiins Ungrimtheite gfunge..  
Si heige s' Boue gloub müesse ungerbräche  
Jo d'Angscht isch cho, sie müessi gar abbräche!  
Vermiide het me der gröshti Krach  
Schlussändlech mit äme abegsetzte Dach

D'Boubewilligung het der Verein nachträglech übercho  
Drum hei si ou das Hüsli gliich no chönne lo stoh.  
Usboue das chönn me de aber vergässe  
Süs ch gäbs vom Kanton de eis uf 'd Frässe.

Vo däm won i jetz ha chönne Brichte  
Si natürli ur auti Gschichte.  
Schnee vo geschter seit me däm  
Drum vergässed die Gschichte am beschte schnäu

Jo, u mit äm Wachse vom Verein  
Bruchts doch eifach äs grössers Heim  
U das töife Dach isch sowiso nid guet für d'Gringe  
I mängem Chöpf chönnsch äue verdrückti Hirnzäue finge

Ä länge Wäg het der Verein vor fasch 10 Johr du gno  
Ohni z'wüsse, ob si je ä Bewilligung wärde übercho.

Erschti Antwort Waldabteilig: das geit nit  
Erschti Antwort Amt für Gemein und Raumordnung, niet  
Leider hei d'Behörde die alte Gschichte nid vergässe gha  
U drum hei si zersch ou so stur u bünzlig ta.

Dr Verein het aber nid lugg gla  
U het sech überleit wie's no chönnt ga

Umzone ine Sport und Freizeitanlage isch di einzig Möglichkeit  
Das es villedch irgendwie, irgendwie no witer geit.  
Aber ohni Goodwill vo de Ämter wird das nid glinge  
Das Projekt uf ne grüne Zweig chönne z'bringe

Mir, vo Bleibach hei s' Projekt aber steht ungerstützt  
U schiinbar hets schlussändlech ou no chlei gnützt.

Wie sechs zeigt het s'ech d'Usdur glont  
Lueget was für nes gfröits Huus jetz do stoht

Ä hufe Fronarbeit steckt do drhinger  
U dr Verein isch derbi dr Gwinner

I hoffe d' Stromer heige guet verdrohtet  
So, dass d'Beluchtig und ou d'Chüelig grotet.  
Vorauslem d'Chüelig sött de scho verha  
Süscht müsst i s Fescht chli früener verlah  
Wüu warms Bier und warme Wisse  
Das man i de grad gar nid bisse.

Mir wünsche öich viel gfröiti Stunde im nöje Hus  
Guete Hornussersport Johr i Johr us  
U gli wird s'Eidgenössische do stattfinde  
Wo die 2 Gemeinde tuet verbinde

We Thöige u Bleibach öppis zäme mache  
De lömers meischtig vou lo Krache  
Auso no einisch, dä Umbou isch nech wüerkli glunge  
Mir wünsche öich ä hufe schöni Stunge.